



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 3

Yangia anidakangma :

Tir Yimyim

tiryimyim@aolima

tir yimyim

TAPAK 8

Congress-i Telangana assembly elections atema manifesto saya

Arsene Wenger-i Bhubaneswar nung AIFF-FIFA Academy lapoktsütsü



VOL. XXI NO. 41 (ADOK 41) DIMAPUR

KÜPTOKNÜ (SATURDAY)

YIMPOKSÜI (NOVEMBER) 18, 2023

₹ 5.00

ANCSU-i Ministry dang scholarship meshir

Dimapur, November 17, 2023 (TYO): All Nagaland College Students' Union (ANCSU)-i November 17, 2023 nü Ministry of Tribal Affairs dang Post Matric Scholarship tatembangba installment agüjang ta shidi ka zülüogo.

Yaküm November 16 nung 2021-2022 financial year atema arrears Rs 36,08,43,250 agütsüba den 2022-2023 financial year atema mezüngbuba instalment (50% of Central share) agütsüba atema kanga pelar ta ANCSU-i shidi nung shia lir.

2022-2023 financial year atema kaketshir 43,424 nem Rs 4685.29 lakh agütsütsü ta asadanga aliba nungi senji agütsü. Ajisüaka Ministry of

Tribal Affairs-i küm shia Nagaland state nem scholarships mapang shitak nung magütsü sota ayuba atema mepelar, ta ANCSU-i ashi.

August 31 nü scholarship agütsüba bangdakpurtemi Utilization Certificate agütsüogo saka anogo 70 süiaka iba mapa meinyak lir. Anungji Ministry of Tribal Affairs-i kaketshirtemi scholarships nüngdakba angatetsü aser tekaratiba nung 2022-2023 financial year asoshi CSS-PMS instalment agütsütsü mepishir, ta ANCSU-isa metetdaksü.

Parnokisa Ministry of Tribal Affairs dang küm shia Nagaland state bendanga mamshitsü mepishia metetdaksüogo.

NSDMA-i kümdanga alitsü metetdaksür

Dimapur, November 17, 2023 (TYO): Anogo ishika Cyclone "Midhili" ajanga tsüngsang majungtsü ta Nagaland State Disaster Management Authority (NSDMA), Home Department-i metetdaksüogo.

Cyclone "Midhili" ajanga November 17 aonung nungi tenzüker November 18 anepdang tashi mopung tesashi aontsü saka Nagaland nungbo balaka mekongshitsü. Ajisüaka item anogo ana tashi Nagaland nung tzünglu kanga arutsü akok ta NSDMA-i ashi.

DDMAs aser tanga line

department ajaki tensa repranga atatsü aser lendong nung nisung taküm aser rongsen kümzüka ayutsü atema renema alitsü metetdaksür ta NSDMA-i sangdong ka nung ashi.

Nübertemi tsüngi, mopung tesashi aser tzünglu tashii aruba mita atatsü ayongzüker. Tsüngsang majungdang nisungtemi tsüngi aser ajungben tzümet süng nungi jenbua alitsü atema süngdong tulu aser ayongküm anasa maotsü mepishir ta NSDMA, Home Department-i saka metetdaksüogo.

Nagaland kübok tesem 7 nung VBSY agiogo

Dimapur, November 17, 2023 (TYO): Nagaland nung district balala nung Viskit Bharat Sankalp Yatra (VBSY) tenzüker tanü agi anogo asemubua agia aruogo.

Hokolbarnü Dimapur nung tesem pezü, Tuensang nung ana aser Mokokchung district nung tesem ka nung iba sentong agi.

November 15, 2023 nü Prime Minister Narendra Modi-i Jharkhand kübok Khunti yimtsüng nungi iba yatra tenzüka liasü.

Centre sorkar indang welfare schemes aser policies tali meteta kümdaksütsü aser mapa 100% inyaksü tangatetba nung iba yatra ayonga agir.

Longkhim Block, Tuensang District kübok Old Mangakhi aser New Mangakhi yimtsüngtem nung agiba sentong nung Department of Ayush, GOI Director Vikram Singh-i tongti tesemdang ama shilem agia liasü.

Sentong nungsa Technical Officer CTR Prasad Das, EAC Keyileitang Ntang, Longkhim

BDO Sademongba Sangtam, SMOITaka Pongener aser Nodal officer BBFCL Aicheng K nungertem aden.

Iba sentong nung 'Hamara Sankalp Viskit Bharat' tezüngzüktep agia liasü aser welfare schemes nungi beneficiaries nem tenüngsang agütsü. Parnokisa (beneficiaries) ajangshia aruba osangtem lemsatet aser spot medical checkups, Ujjwala registration aser banking felicitation services shilemtem agia liasü.

Dimapur district nunga Kuda village, Padum Pukhuri, Ekaranipathar aser Chumoukeidima block kübok Eralibill nung sentongtem agi. Iba mapang LED screens enokba VBSY outreach van garitem amshi.

Mokokchung district nunga Ongpangkong south block kübok Aliba yimtsüng nung iba sentong agia liasü.

Tanü nikongdang VBSY outreach van gari ka Mokokchung tongogo aser gari ajanga district nung agiba sentongtem nung yariteptsü.

ABAM 127 buba Küm Tatem Mungdang agiogo



Impur, November 17, 2023 (TYO): Ao Baptist Arogo Mungdang (ABAM) 127 buba Küm Tatem Mungdang November 16 & 17, 2023 nung kanga takok ngua agiogo. Taküm mungdang nung arogo ajak agi 163 aser fellowship 8 nungi teshimtet nübo 847 arua denogo.

Mungdang lapokba sentong nung ABAM Tir Rev. Temshi Lkr-i tayongzüka agütsüba mapang nung "tamangertem teinyaksü tububaji Tekümtet agütsüba ya lir, anungji asenok inyakba ajakji Tekümtet osang agütsür südi" ta tayongzüka tulu agütsü.

ABAM Executive Secretary Rev. Dr. Mar Pongener-i ABAM küm piyong inyaka aruba osang metetdaksü.

"Asenok ya Tsüngrem tenüng uludaksütsü tentetba telok asünung mapang ajak nung Pai len ania arudar. Anungji tia tensa balala ajuruaka maneni asenok ajaki temulung matem

Pa dak tamang tulu yur Pa wadang inyaksü" ta Rev. Dr. Mar-i 2 Korint 4:8-10 nungi ajemdaker tayongzüka tulu agütsü.

ABAM Women Ministry Secretary Mrs. Alemla Mozür April 30, 2024, mapa nung küm ter (10) abensar asünung la den tepila sentong tajung ka agia liasü.

Tatempangba sentong nung MTBA AA (Alcoholic Anonymous) Fellowship ajanga lokti ajak nem tayongzüka tulu agüja ken tajung tena liasü. Iba ya arogotem ajak asoshi pei tatah shilem tulu aliba tali jangshiyim mapang tajung ka süa temoatsü angu.

2024 küm Tsüngremer mapa inyaka aodang Pa taochi aser leniba alitsü asoshi amangbapur ajaki sarasademdi ta ayongzüker ta Rev. Dr. Mar Pongener-i sangdong ka nung metetdaksü.

Taküm ABAM Küm Tatem Mungdang nung tongtipang telemtetba agiba kar tsünglanglen agütsür.

1. 2024 küm ABAM Omen "Tsüngrem dang Sentsüwangshi" (Galatia 1:5) alitsü.

2. Rev. Dr. L. Lima Jamir, Pastor, DABA, Tir aser tatong Tir Rev. Ayu Pastor, Dibua Baptist Arogo sür 2024 küm ABAM Tsüngremer wadang inyaka aotsü.

3. Sovima Ao Baptist arogo aser Liroyim Baptist Arogo ABAM nung affiliation süa arogo kaka kümogo aser Bangmetem, Chumoukedima 'A' aser Narotekong Fellowshiptem ABAM nung Fellowship recognize asü. Tang ABAM kübok ajak agi arogo 169 aser fellowship 15 ta lir.

4. ABAM ajanga Aortem ken O zulur ajungmesotsü asoshi kaket tajungtiba nem (Book of the Year) award agütsür. Iba award ya 2023 küm asoshi Mr. P. Alem Jamiri züluba kaket "Arenlung" ngua liasü.

NHRC-i NE nung meimchir temeten anema inyakba ken o 56 angaogo

Guwahati, November 17, 2023 (Agencies): National Human Rights Commission (NHRC)-i Guwahati nung anogo ananü "camp sitting" ayonga agidang Northeast state tem nung ken o 56 tashi angadangogo.

NHRC chairperson Justice Arun Kumar Mishra menden ser agiba camp sitting ya Hokolbar nikongdang tembang.

Iba sentong nung NHRC züngsemtem Dr DM Muly aser Rajiv Jain na den secretary general Bharat Lal, registrar (law) Surajit Dey aser tanga tongti ketdangsurtem aden.

Northeast state tem nungi ken o balala angadanga rongnung Arunachal Pradesh kübok Anandapur-I, Anandapur-II, Brajapur, Bodhiasatta-II nung Chakma nung ali tim mesüi lemsaba, Kokrajhar town nung non-tribal kati arishi küm 16 tain tetsür ka dak tashiyim agi shi

nung medemba, Northeast Frontier Railways-i Imphal den Jiribam sendaktepba mapatong nung nisung 57 asüba, Churachandpur, Manipur nung district hospital mejungi aliba aser Manipur nung ozüng alema mapa inyakba ken o tem dena liasü.

NHRC-isa Arunachal Pradesh nung Changlang district kübok Chakma o Hajong kibong 108 nem temenok magütsüba angadanga.

Ken o balala angadanga sülen NHRC-i NGOs aser human rights defenders (HRDs) den ajurutep sensaksema liasü.

Northeast state tem nung NGOs aser HRDs ajanga mapa tajung inyakba atema NHRC-i tenüngsang agütsü aser maneni tetsübu melii mesüra tejak mereprangi mapa tajung inyaksü ayongzüker.

NHRC-isa Northeast state tem nungi chief secretaries/DGPs dang action taken reports meshi.

Parnokisa ketdangsurtem dang mapang shitak nung report agütsütsü tetuyuba agütsü.

NHRC-isa NE state sorkartem dang State Human Rights Commissions (SHRCs) indang infrastructure tajungba akümtsü aser SHRCs nung mapa tazüngtem nung nisung anioktsü metetdaksü.

NHRC-i 2007 nungi "camp sittings" agia arur aser iba sentong ajanga meimchir temeten anema takoksa ajururtemi temeten angur.

Tang tashi nung NHRC-i Madhya Pradesh, Punjab, Kerala, Maharashtra, Puducherry, Andhra Pradesh, Jharkhand, Andaman and Nicobar Islands, Nagaland, Uttarakhand, Rajasthan, Arunachal Pradesh, West Bengal, Tamil Nadu, Uttar Pradesh, Bihar, Karnataka, Odisha, Gujarat aser Assam nung "camp sittings" ayonga agiogo.

Mkg. nung Livestock vaccination indang shisatokden sentong agi



Mokokchung, Yimpoksüi/Nov. 17 (TYO): Angetyongpang Area pur atema 'Livestock Vaccination' dak sentakba nung shisatokden sentong ka Sungkomen Ward Community Hall, Mokokchung nung ayongzüka kaogo. Iba sentong ya Veterinary Department den yaritepa Angetyongpang Development Board (ADB)-i ayongzüik.

Sentong nung MLA & Advisor, Dept. of Water Resources, Tongpang Ozükümi-jembidang, Angetyongpang ya tekübok tia nung aliba constituency ka lir aser yangi lenla balala nung tebilemtsü aika lir. Teinyaktsü mangdang aika alinung, item kar danga mapa küma inyaktsü nükjidong nung Angetyongpang Development Board ya shisatsü nung nungitdaksütsü asoshi tentetba lir, ta ashi.

ADB ajanga tensa den apet

mapang apir shisatokden sentong balala ayonga akatsü, aji oda, sentong tapu balala atongaka nüburtemi item maongkaji magira ajakji amajok asütsü, anungji, ajaki nentaka aser temulung agütsütsü ayongzüik. "Pungmang aika lir, anungji, nüburtem nungi amalitepa shilem agidaksünür", ta paisa ayongzüiksem.

Shisalen sayur, Mokokchung Chief Veterinary Officer, Dr. B.M Sunep-i tanü asüng ak tashitak tapu balala buluba aser item nung jagi kümdanga alitsü indang, mozü atubayim, ak anepaluyim, tajangzüik koba tashi lir aser ak metsüba dak sentakba nung tekümdangtsü aser tangatetsü onük aika bener arua lemsatöp.

Sorkar mapa aika aliba limaji kodanga takar makümtsü, aji oda, chirnurtemi meranga zünger tatidang balala nung takok ngutetra temoa, saka

ajakibo sorkar mapa inyaktsü maongka mungutetsü. Anungji, tazüng temeteter aser tejanrartemibo pei yimtsüng nung ak metsütsü asoshi paisa ayongzüik.

ADB nung züngsemtemji Angetyongpang Assembly Constituency kübok aliba yimtsüng aser town balala nungi nisung teshimtetpur densema lir. Ibai tongtibangsa Angetyongpang area nung rongsenketzüng jenjang ajungkettsü nükjidong nung tentetba lir.

Tanü iba iba sentong nung Angetyongpang kübok aliba yimtsüng aser town balala nungi yimden yimsüsür den ward lenir aser Nationalist Democratic Progressive Party (NDPP) aser Bharatiya Janata Party (BJP) nungi tenzükerkem aden. Sentong nung ADB convener, Lepzung Pongenia teinyaktsü sentong aliba kar lemsatöp.

GHSS Jalukie nung tesayur maliba timtem lemsatöp

Dimapur, Yimpoksüi/Nov. 17 (TYO): School Education indang Additional Secretary, Hiazu Meru, NCS-i November 16, 2023 nü Government Higher Secondary School, Jalukie semdanga liasü.

Iba mapang tesayur aser non-teaching staff peria maliba ajanga küm aika timtema aruba indang school principal, Asenla Pongen-i lemsatöp liasü.

Staff peria aliba ajanga school inyakyim shidak moteter aser kaketshirtema timtem ajurur, ta lai ashi.

Additional Secretary, Hiazu Meru-ia danga school tem

semdangba mapang ajangshibatem aser shisatsü balala lemsatöp liasü.

School ketdangsür temi school nung tebilemtsü balala ajuruba lemsatöpba asoshi pai pelaba lemsatöp aser sorkari item timtem aser metokmeperi asoshi mera agitsü ta ashi.

Kasa mapang pai school ketdangsür aser School Development and Management Committee (SDMC) tem den sensaksempa mapang agia liasü.

Maneni Class 10 aser 12 nung azünger kaketshirtem dena sensaksemba mapang agia liasü.

Nagaland state BJP tiri district ajunga semmaogo



Dimapur, Yimpoksüi/Nov. 17 (TYO): Nagaland State BJP tir Benjamin Yephthomi aser state BJP ketdangsür temi October 28, 2023 nü Mon nungi tenzüka district ajunga sema jajaba sentong November 17, 2023 nü tembanga BJP Dimapur District ajanga Hotel Saramati, Dimapur nung sentong tuluka ayongzüka liasü.

State BJP tekolakbai Nagaland nung party tuluba aser tashi taitba kumdaaktsütsü tejangraba nung state tesem balala sema yimdak-yimtsüng nung alirtem den tesendaktep yanglua liasü.

Nagaland State BJP tiri state nung nüburtem ajurutsü asoshi district ajunga semdangba ibai mezüngbuba alitsü, ta sangdong ka ajanga ashi.

Anogo 23 nung state BJP tir Benjamin Yephthomi-i Nagaland nung aliba district 16 nung - Mon, Aboi, Longleng, Tuensang, Noklak, Shamator, Kipheri, Meluri, Phek, Zunheboto, Mokokchung, Wokha, Kohima, Jalukie, Tenning aser Dimapur semdanga liasü.

Item tesem ajunga nung Nagaland state BJP tir aser par teloki District Office Bearers, Mandals, Morchas aser Booth

Level ketdangsürtem den senden balala mena liasü.

Dimapur nung District Touring Culmination Program nung jembidang Benjamin-i ashiba agi, district 16 prong, Mandals 60 prong aser Booth Levels nung nüburtem aser party workers temi timtem ajuruba aser parnok tia asangsang nung metettsü asoshi iba setong ya agi.

Yimdak yimtsüng nungi state level tashi BJP temaba jenjangi ajungkettsü asoshi asenoki bendanga agütsür inyaktsü mapang tongogo, ta pai ashi.

Paisa party aintsü asoshi karyakartas ajunga dang district president tem den amalitep akatsü ayongzüik aser tekeratiba nung Morcha Heads aser Mandal Touring Program tenzüksüla aser kechi südi süaka December ita tatem tashinung tembangtsü nüngdaker, ta ashi.

Parnoki district balala sema jajaba mapang BJP Nagaland indang karyakartas temi parnok pelashishia agizükba atema pai pelaba lemsatöp aser Dy. CM aser BLP Leader Y Patton-i mapang ajak nung yaritepba asoshia pelaba shia liasü.

CHSS Dimapur nung State Level Debate Competition ali



Jan Jatiya Gaurav Divas 2023 nungtem nung November 17, 2023 nü Christian Higher Secondary School, Dimapur indang Covenant Hall nung State Level Debate Competition ayongzüka nung takok angur aser ketdangsürtem külemi tangokba noksa ka yangi angur.

Dimapur, Yimpoksüi/Nov. 17 (TYO): Jan Jatiya Gaurav Divas nungtem nung State Level Debate Competition sentong ka "Tribal Freedom Fighter" omen kübok CHSS Covenant Hall, Dimapur nung November 17, 2023 nü ayongzüka liasü.

Iba o intepba sentong ya 'Ownership and Transfer of Land and its Resources under Article 371(A)' onok nung agia liasü.

Iba sentong nung Little Star Hr. Sec/ School, Holy Cross Hr. Sec. School, Mission Hr. Sec. School aser Christian Higher Secondary School Dimapur nungi kaketshir temi shilem agia liasü.

Iba tetoktepa nung mezüngbuba jenjang ya Little Star Higher Secondary School, Dimapur nungi Class 10 nung azünger Liang Yanna-i angu, tanabuba jenjang ya kasa school nungi Class 12 nung azünger Rongsennangba-i angu aser tasembuba jenjang ya Holy Cross Higher Secondary School, Dimapur nungi Class 12 nung azünger Avilhu Meyase-i ngua liasü.

Iba sentong nung Secretary, Tribal Affairs, Angelina Tajen aser Director, Tribal Affairs, I. Sino Phom na adenba ajanga sentong tali meraketdaksü.

Iba sentong ya Department of Tribal Affairs ajanga

Christian Higher Secondary School, Dimapur den lungjemer ayongzüka liasü.

Mkg nung 70th All India Co-Operative Week amung

Dimapur, Yimpoksüi/Nov. 17 (TYO): Assistant Registrar of Cooperative Societies, Mokokchung ajanga November 17, 2023 nü Sangtemla Multi-Purpose Hall, Mokokchung nung "The Role of Co-Operatives in Making India \$5 Trillion Economy and SDGs" omen kübok 70th All India Co-Operative Week sentong ka ayongzüka liasü.

Iba sentong nung jembidang, amalitep akaba aser külemi lungjemer inyakba ajanga dang lokti ka tashi itdaksür aser

tejakleni aor, ta tesemdang tongti, ADC Mokokchung, Chumlammo Humtsoe-i ashi.

District nung Registered Societies timba yakyaka lira, kechi südir süaka nüburtem aser loktiliba temaba jenjangi anotsü, ta pai ashi.

Department (Co-Operative Societies) nükjidong ataloktsü asoshi employees temi kisüng masü saka nüburtemia tongti shilem agitsü kanga tongtipang lir, ta pai ashi.

Paisa kija aser lokti balala dang külemi tejakleni aotsü

asoshi Bank nungi sen apua aliba tekeraba nung menoktsü ajungshia liasü.

Iba sentong nung Dy. District Agriculture Officer, Maongsangla aser Manager, NSCB Ltd. Mokokchung natia o tatsütsü jembi.

Sentong nung menden ya Inspector, Co-operative Societies (ICS), Mokokchung, Meyilemla Pongen liasü aser Asst. Registrar of Co-operative Societies (ARCS), Mokokchung, Imtionen-i melepzüng o jembia liasü.

Congress-i Telangana assembly elections atema manifesto saya



November 17, 2023 nü Hyderabad nung Congress party Tir, Mallikarjun Kharge, Telangana Congress Tir A Revanth Reddy aser AICC Telangana in-charge, Manikrao Thakare nung densema party lenirtemi Telangana assembly election atema party manifesto sayadang tangokba noksa nung angur.

Hyderabad, November 17 (Agencies):

Hokolbarnü Hyderabad nung Congress party-i Telangana Assembly elections atema party manifesto sayaogo. Party manifesto sayatsü jakdang Congress Tir, Mallikarjun Kharge-i X ajanga, party-i state nung aliba nübürtem nem loktiliba nung temeden agütsütsü, rongsenketzüng tashi agütsütsü aser terenlok agütsütsü atema inyaksü, ta metetdakja liasü. Paisa Congress-i Telangana nung alirtem dang nangzükba onük trok metetdaksü. Hokolbarnü Hyderabad nung Congress-i sayaba manifeto nung tenangzükba

trokji yamai lir- 'Mahalakshmi' scheme kübok ita shia tetsür nem sen 2,500 agütsütsü, gas cylinder sen 500 agütsütsü aser tetsürtem bus nung angati senzüdaksütsü. Congress-i takok ngua sorkar kümra 'Gruha Jyothi' scheme kübok kibong ajak nem ita shia electric light unit 200 angati agütsütsü nangzük. 'Indiramma Indlu' scheme kübok ki malir kibongtem nem ki asütsü atema kimong agütsütsü aser ki asütsü atema sen lakh 5 agütsütsü. 'Yuva Vikasam' scheme kübok kaketshirtem nem sen lakh 5 teyari agütsütsü aser Telangana movement atema

rarartem nem ki asütsü atema ali tasazük 250 sq yards agütsütsü, ta Congress election manifesto nungsa shia lir. 'Cheyutha' scheme kübok teintet sensotem, amitsürtem, matamabensartem, AIDS aser Filari agi shirangertem aser tezüngjang nung timtem adoka 'dialysis' agirtem nem ita shia pension sen 4,000 agütsütsü, ta Congress-i nangzük. Congress-isa sen lakh 10 jenjang health insurance agütsütsü, ta nangzükogo. Menden 119 aliba Telangana Legislative Assembly election November 30 nü agütsü aser December 3 nü vote zünga election osang sangdongtsü.

PM Modi-i Israel-Hamas rara nung civilian tepsetba aitsür

New Delhi, Yimpoksüii/ November 17 (Agencies): Hokolbarnü Ato kilonser, Narendra Modi-i Israel-Hamas rara nung civilian aika tepsetba aitsüogo. Hokolbarnü New Delhi nung 2buba Voice of Global South tetenzük senden nung jembidang Ato kilonser Modi-i, mangatettep ken otem bentettsü atema atsü-anem akatsü aser ken o jembitsüji kanga tongtibang, ta ashi. Paisa, West Asia region nung tayongzükba aika ajangshidar, item teblemtsü kottettsü atema yimtenren ajanga inyaksüla aser ken o jembitsüla, ta ashi. "West Asia region nung

tatalokbatem ajanga ajangshiba tayongzükba balala asenoki kuli süa ngudar. October 7 nü kiralongrartemi Israel amakba India-i sashia aitsüogo. Onokisa atsü-anem akatsü ayongzükogo. Israel aser Hamas na tsüngda raradang civilian aika asübaji onoki sashia aitsür," ta Modi-i metetdaksü. Ato kilonser, Palestine Tir Mahmoud Abbas den jembiba sülen India-i Palestine nung dangi teyari balala yokogo, ta metetdaksü. "Alima ajungtsü atema Global South nung aliba linüktem longjemtsü nüngdak. Global south ya tetenzük nungi liasü, ajüsüaka tang longjemer inyakba ajanga tang mezüng

alimai asenok ola angashir," ta Ato kilonser metetdaksü. 2buba VOGSS (Voice of Global South Summit) senden nung Global South nung aliba linüktemi G20 senden balala nung lemtetba onüktem atema jembitsü. Iba dak alia tang alima n u n g t a y o n g z ü k b a onük balala atema jembitsü. "Global South" ya Asia, Africa aser South America kübok south hemisphere nung aliba linüktem tentet lir.

India tsür ka Gaza nungi kümzuka Egypt-i anir ogo

Jerusalem/Cairo, November 17 (Agencies): Indian missions teyari ajanga India tsür ka rara aliba Gaza Strip nungi kümzuka Egypt yimtiba, Cairo tonga anir ogo aser la den lar kibong Kashmir-i arutsü tebilemba lir. Lubna Nazir Shaboo ya Jammu & Kashmir nungi lir. Lar jabaso ka aser jala ka na Egypt yimtiba, Cairo nung azünger. Hombar nikongdang la den lar jala, Karima na Rafah arrtsü adena aruba sülen Mongolbarnü Cairo yimti tonga aru.

Lubna aser lar jala nunger külemi tangokba noksa ka lemsatep. Indain Embassy-isa, "Amb @AjitVGupte-i Cairo nung India tsür, Lubna Nazir Shaboo agizük. La den lar kibong ajak junga lir. Lubna-i @indemcairo, @indemtel aser @ROIRamallah dang pelaba lemsatepogo," ta metetdaksü. Lai video ka ajanga, "Gaza nung tensa kanga majung. Onoki tzü, electricity mesüra internet mangur aser telecommunication kanga majung. Yangji onoki mapang tamajung ajangshiogo. Anogo shia tensa tamajungba dang akümer. Anogo shia nisung jenti asür aser yirur. Ki chirepba jana agi tasü mang aika nembanga lir," ta metetdaksü. "Chiyungtsü aser mozü agi kanga anünger. Medical teyari mali. Hospital nung service magütsür. Tesem ajaklen bomb apoker. Iba video yagi nisung ajak ket atongtsü ni imlar. Iba video ajanga 'second' shia Gaza nung tensa tamajungba akümba osang sangdongtsü," ta lai metetdaksü. Hamas-i Israel amakdang Israel nunger 1,200 shi tepsetogo aser Israel-i Gaza amakdang tang tashi nung Palestine nunger 11,000 dak tema tepsetogo.

Cairo nungi India nunger osangbenertem den jembidang lai, "Ni Gaza nungi Rafah arrtsü adena aruogo aser maneni Kashmir-i meyipa arutsü atema atadar," ta metetdaksü. La Gaza nungi kümzuka anir aruba atema lai Ramallah, Tel Aviv aser Cairo nung aliba Indian diplomatic missions nung ketdangsertem dang pelaba lemsatep. October 7 nü Hamas-i Israel amakba sülen October 10 nü lai osangbenertem den tongtepratepa teyari meshia liasü. La Cairo atongba sülen Cairo nung aliba Indian Embassy-i twitter ajanga Indian ambassador to Egypt Ajit Gupte,



Indian ambassador to Egypt Ajit Gupte, Lubna Nazir Shaboo aser lar jala nunger külemi tangokba noksa nung angur.



November 17, 2023 nü Sehore district nung aliba polling station ka nung Madhya Pradesh Chief Minister, Shivraj Singh Chouhan aser pa kinüngtsü Sadhna Singh nati vote agütsüba sülen vote agütsüba temaitsü temeyong sayudang tangokba noksa nung angur.

ALL INDIA INSTITUTE OF MEDICAL SCIENCES
ANSARI NAGAR, NEW DELHI – 110 608
EXAMINATION SECTION
Common Recruitment Examination for AIIMS
(CRE-AIIMS)
Advertisement No. 239/2023

Anogo: 16/11/2023

Participating AIIMS nung Group-B & C posts balala atema shimtsü asoshi AIIMS (CRE-AIIMS) indang Common Recruitment Examination
 Participating AIIMS ajak tenüng nung Group-B & C posts asoshi temsüa aliba India sensotem shimtsü atema Online applications meshir, aser schedules ji yamai asütsü.

Applications atema Online Registration	
Start Date	17 th November, 2023 (Friday)
Close Date	01 st December, 2023 at 5:00 pm (Friday)
Date of application Status	05.12.2023 (Tuesday)
Date of Recruitment Examination	
Date of issuing of Admit Card	12.12.2023 (Tuesday)
Date of Exam	18.12.2023(Monday) & 20.12.2023(Wednesday)
Exam City	All Major Cities of India

APPLICATION FEES:
 A) General/OBC Candidates : sen 3000/- (sen meyrjang asem)
 B) SC/ST Candidates/EWS : sen 2400/- (sen meyrjang ana ser noklang pezü)
 C) Matamabensartem (PwDs) : sen magütsü.

- Candidate temi application fee ji DEBIT CARD/CREDIT CARD/NETBANKING ajanga agütsütsü akok. Transaction/Processing fee agütsütsüsa lira ibaji candidate-i bank nem agütsütsü.
- Application fee agütsüba sülen ibaji meyipa mangutsü.
- Fee medenibo applications ji magizüksü.
- Iba tatidang agütsür SC/ST candidates indang application fees ji result sangdongba sülenbo mapang nung meyipa agütsütsü.

Tongtibang : Osang tejangja atema website www.aiimsexams.ac.in mesüra participating AIIMS nung repringang.

- Temsüa aliba candidates indang application aser Admit cards status ji AIIMS website www.aiimsexams.ac.in nung dang upload sütsütsü. Candidates kari application agütsüdag timtem ajangshira on My Page (Dashboard) nung login süa metetpelatsü akok.
- Application agütsür ajaki mapang shia iba website repringtsüla, kechiyong temetongshiba/osang tali/osangtsüsang ajak iba website nung dang upload sütsütsü.

Sd/-
ASSISTANT CONTROLLER (EXAMS.)

CBC 17112/12/0036/2324



TIR YIMYIM YIMOBILEM (EDITORIAL)

DIMAPUR

KÜPTOKNÜ

YIMPOKSÜI 18, 2023

Osangbenertem ajungshitsüla

Yakanü India ajaklen osangbenertem anogo , National Press Day, liasü. Iba anogo ya India nung osangbenertem tetsübu aser tarendak melii pei mapa inyaktetsüsa temeten agütsütsü atema Press Council of India kümteta 1966 kum mapa tenzükba anogo lir. Iba anogo nung government-i osangbenertem atema sentong tajung yanglua shisalemtepa amonger aser osangbenertem rongnunga tajungerbo shimteta senpeta agütsür. Aji oda, kasa anogomung nung government-i osangbenertem asoshi teyari agütsütsü atema sentong balala renema metetdaksür. Iba amaji alima ajaklen osangbenertem dang meima aser akümtsübu benshir, kechiyong parnokji government o nübortem na tsüngda osang belenertem lir. US nung taoba tir Thomas Jefferson-ibo " osangkaket mali ser government alitsü agibo government mali ser osangkaket ali tajungba," ta shia liasü. Atangji, talisa tanü ama lima ka nung osangkaket mali ser alitsübaji nisung malidak pei kija arem nung alir amai asütsü. Tanübo osangkaket dang masü saka tenük agia repranga osang angashitsüsa tv aser Youtube channel tapu balala lir, anungji alima nung atalokbatem dang masü saka taküm nung nungdakba shisatsü aser temetetsütem aika kidang mena yur angazüker. Aji oda, osangtsüsang bendena metetdaksüba nung nübortem asoshi tajangzük kaji government-i inyakba aser meinyakba mapatem indang metetdaksüba ya asütsü. Ano, yimten aser lokti nung mimshia inyakba mapatema bushisüngdang osangküma renemer metetdaksür, iba jagi inyakterem kümdangshidaksür. Atangji, osangbenertemi pei taküm agi tendanga ochimashi mapatem indang bushisüngdanga osang küma yanglur metetdaksür, anungji ochimashirtemibo osangbenertem maginer. Aji oda, osangbenertem ya kinüker azütemang mesük, kechiyong parnoki meshitak nisung kidangi arura asanger aser meindoker. Iba jagi kiji kiburi meteta aser memeteti kümzuka ayur. Atangji, kinüker azüi asangyonga kidang alirtemi aji meteta meshitak nisungtemji mepura jenadoktsü, saka kidang aliba oset aser takümbo kümzöker. Ashiko, asenokibo Jefferson tangatetba amaji masü saka osangkaket kenyongi mali ser aliba government-ang ka aginüa alitsüa akok, ajisüaka osangkaket maliba lima nung alir nübortemji government tenzükertem masü government lar asütsü. Tia junga asen lima nungbo osangkaket anemertembo mali saka osangbenertem den jungtepnerang teimba lir, kechiyong parnok dak aketba tashiji parnoki meteta lir. Iba ama nübortem nungi teyaritep aser akümtsübu anguba lima ka nung osangbener mapa inyaktsübaji koda jangratemtsü ta bilema, osangbenertemia government nung alirtemi kechi ashir, aji nübortem nem metetdaksütsü aser ano nübortemia kechi ashir, parnok timtem aser nungdaktemjia government nem metetdaksütsü ta tiyongtsü nokdaka yur, külenlen alirtem nem nungdak belentsür ka küma inyaktsübaji kanga nungdak aser tongtibang mapa ka asütsü. Atangji, osangkaket adokyonga nübortemi sapua mezüngra osangkaket adokba nükjidong amajok akümer aser külen osangkaket mazüngba loktiji shiruru telok ka chiyongtsü bushia senzür ama ka dang lir. Aji oda, nübortem asoshi adokba kaketterem rongnung jenjang dalangtiba aser tekaratiba nung tonga aruba kaketji osangkaket ya lir. Iba yagi osangtsüsang dang masü saka shisakar aser temetetertemi onük balala lemsatepba ajanga tazünger shisa tenük lapoker. Aji oda, kibong ana rongnunga osangkaket azüngba aser mazüngba kibong nung intetba tanurtem na tsüngda shisa akaba aser temetetba nung tepila talangka asütsü. Tanübo kaketreju kija nung angazükba agi meperir, anungji meperibaji osangkakettem azüngba ajanga peridaksür. Item nungdak aser tajangzük osangbenertemi lokti nem agütsüba reprangteta tangar state-tem nung ama, Nagaland nunga state government-i osangbenertem ajungshia 'award' aser 'pension' agütsü nunga koda jungla !

OLEMSABANG

Tesüiba Putu-i Inyaka Yutsüba lemtet tem Meputeper ya metemdanga meyiba Reprangshidangtsü koda

T. Imti Jamir

(Yashi adok nungi...)

Conclusion

1872 Dec 23 nung Molungkimong yimdak arogo ka tenzükbaji kuli tejangja. Sakatamalen agütsüba kulitem jagi 1872 Dec 23 nungi 1972 tashiji Molungkimongnung baptiba member metangdangi dang lia aruba record mangur.

Anungji züluba record aser taküm alir-i ashiba agi tang Molungkimong nung aliba arogoji 1919 nungang tenzükba arogo asüba agi 1972 Molungkimong Centenarynung ABAM-i shilem magiba dangashi Molungkimong arogo mapa nungji ABAMi kecha jangjonga mali aser ano mejangjonger.

Chairman

Mr. Sobulepden

Chairman

Secretary

Mr. L. Pona Jamir

Secretary

ABAM Ex.Committee Impur

10/10/1980

1986 ABAM lemtet anema ABAM dangi agenda abenba tanü tashinung mangazük, iba dak ajemdaker 1997 kum ABAM dener Molungkimong aser Molungyimsentong tajung agia kum 125 amongba angashiogo, sürabangla koda sür Dr. Clark Pastorinyakba arogo ka nung Tsüngrem O jemi-i maotsü lemtet. Molungyimsen 150 benjongnung ABAM Executive Secretary Tsüngrem O jemi-i maotsüsa aküm. Yamaji lemteta yutsür benjong kanungbo aden ka nungbo madentsü lemtetbaji kanga tesümgangtsü lemtet ka masü na? Oct10, 1980 nung JointResearch Committee-i bushitet-a lemtetba ita ka tsüngda nung November 7 melenshibajiba lemtetji khen aroka shisadangtsü nungdak ta bilemer.

1980 ABAM Special Committee sangdong no 4: Anungji ABAM-i1965 nung 'Anungji Khristan tamangba maparen (Doctrinal view) nungibaptiba anogoji Arogo tenzükbaji lir ta lemtetba ama Molungkimong Baptist ArogoCentenary-ji (Ao Arogotem Jubilee amongba yimya ama shitak mongogo ta ABAM specialCommittee-i iba sangdong agütsür. Ya Molungkimong arogo atema dang masü, saka Molungyimsen arogoa dener Ao arogotem ajak atema arogo tenzükba tamendakdak kimungji lir. Süra yamala tarak maket Sangdong ka ABAMi 1965 kum lemtet, idakjibo Molungyimsen arogobo entoker Jubilee amongtsü telemtetbaji koba kum Central Council nung lemteta ali ajibo kanga metetnür.

Onok lanuri mangatetba itemi shir/shibai ratettsütsü?

Molungyimsen aser Molungkimong anogo anati mapang balala nung Mungdang budget magütsüi arur, tanaben agütsütsüsa akümba ya Mungdangi kechi lemtet agiba ajanga atalok?

1986 ABAM Special Committee bener aruba Central Councili agizüka ayuba sülen Molungkimong aser Molungyimsen arogo anapronglai temelenshi kar aginüba shiti Mungdangi dangi arua alia ali asü mali?

Molungyimsen Baptist arogo 150 Jubilee nung ABAM Executive Secretarybo meyoktsü lemtet, saka Lim arogotembo maotsü menokdangba ya kechi tai agi yamai lemtet? Kechiaser Mungdangisa 1972 Molungkimong arogoibo lim arogo shinga maotsü lemtet masü no?

Keno patakati yur kechiba ABAM Central Council nung khen danga benoka mejemi, ABAM Sanen Luden kisüngi dang telung nung iba keno mapang papikati benshir? ABAM Staff nungi ola kecha mali na? Langka agi anangdaksübo masü südi ta lanurtemibo bilemer.

2022 ABAM Peace Committee nung nisung 15 shimba nungji Sanen Luden nungi 9 aser tangar 6 ta shimba ya kechi tebilemba nung Sanen Luden nungi nisung 9 ya shim? ABAMi tensa aser mapang balala nung Special Committee mesüra arogotem tsüngda Yimjung Committee balala shima inyaka aruba otsü nung 2022 ABAM Peace Committee ajanga mapa tamakok anguba ya kinük aikalen nungi tasüngdangtsü lir ta onok lanurtemibo bilemer.

ABAM Executive Secretarykati Mungdang Central Council nung agizüka ayuba indang ano Executive Secretary ana tashi agi iba lemtet memelenshi ta shia lir süra kechibaka nungbo adentsüsa aküm aser katibo maotsüsa lemtetsü?Temelenshika lira kecha masüsaka Mungdang nung temelenshiba ka majangi inyak asü koda asü tebilemdangtsü karajitetba lemsateper. October 10,1980 ABAM Executive Committee Joint Research Committee ajanga bener arubatem Dr. Clark aser missionarytemi zülua yutsüba den medemdanga telemtetba agütsübaji ABAM Special Committee November 7, 1980 nung amendangjia item denji medemdanga reprangdang asü nungbo parnokia tapi agi tatembang oji magütsüla ta bilemer. Naga lima nung mezüng tamang yimsü tenzuka aoba otsü ya Molung ana otsü masü, saka Aor aser Naga Khristan ajak meyong asünung item tatalokba otsü ya shitak lemteta ayutsü tim ta lemsateper.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Asian Pacific Baptist Federation küm 50 ajungba mong amonger



Singapore nung Asian Pacific Baptist Federation (APBF) küm 50 ajungba Jubilee nung adenertem tangokba noksa nung angur.

November 17, 2023: Singapore nung tenzükba Asian Pacific Baptist Federation (APBF) küm 50 ajungba Jubilee mong November 17 nungi tenzükba mongdar aser November 18 nü tembangtsü; iba Jubilee mong omenji "Tarutsü atema longjemer nükla ayuba" lir.

Rev. Dr. Vesekhoyi 'Vee' Tetso, General Secretary, APBF aser Rev. Dr Bobby Lee, Executive Director, Singapore Baptist Convention nati salem osang aben.

Iba dak alia taoba mapang APBF Tirtem- Dr. Billy Kim, Korea, Rev. Harry Monro aser Rev. Jason Das nungeria salem osang lemsatep aser taoba mapang APBF General

Secretary, Rev. P. Bonny Resu- i APBF puti otsü metetdakja liasü.

Kasa sentong nung taoba mapang Tirtem, PBF Youth aser Women departments den sensaksem.

Tetushi tejaoker, Rev. Dr. Elijah M. Brown, (General Secretary, Baptist World Alliance)-i "Nükla nung rangloker Tsüngrem den Mission wadang inyakba' onük jembia aser Academic Dean, TBTS Dr. Rachel Tan-i "APBF tarutsü nung ayaoker" onük jembia.

Shisalen sayurtemi "Peace, Youth & Theological Education Ministry" aser "God's Work Through Partnership" indang jembia liasü.

James Shekiye Swu leniba nung Nagaland Baptist Church Choir aser Mizoram Baptist Church Choir temi ken tena liasü.

Asia Pacific Baptist Federation ya mezüng Asia Baptist Federation nungja nung 1972 küm November 16 nü Hong Kong nung tenteta liasü aser tangbo APBF nung Baptist tamangertem züngsem million 7 dak tema, Convention 65 aser linük 22 nung Arogo 40,000 lir.

Linük balala nungi tejaokertem iba sentong nung dendar. Kasa sentong nung NBCC General Secretary, Rev. Dr Zelhou Keyho densema Nagaland nungia aika dendar.

Church of England-i Laishiba nung aliba tesayuba sendokogo: ANiE

November 17, 2023: Church of England parliamentary tenteti kasa tetsür o tetsür na mesüra tebur o tebur na kiyimertem moatsütsü telemtetba agiba ya Lai O tesayuba anema lir, ta Orthodox Anglicans-i sashia aitsüogo.

Ghonda aika o toktepa aruba sülen Bodhbarnü General Synod nung iba telemtetba agiba mapang nung Evangelical züngsemtemiba iba telemtetba magitsü mepishia liasü.

Joko tang nungi Church of England-i kasa kiyimertem atema sentong temeja ayongzüka parnok asoshi moaja sarasademtsütsü.

Iba telemtetba anema Anglican Network in Europe (ANiE)-i, Church of England-i iba telemtetba agiba atema onok kanga jashir, ta metetdaksü.

ANiE lenirtemi sangdong ka ajanga, "Church of England-i maneni Laishiba nung Lai o

ajanga agütsüba tashi süa lir.

sendoktsü atema vote agütsüogo; akhidang nungi Arogo tesayuba (tetsür ka aser tebur ka na tsüngda dang kiyimtsü) aser alima tesem ajaklen Anglican tamangertem tangatetba anema vote agütsüogo," ta metetdaksü.

"Parnoki (Church of England) Kibuba Yisu Khrista ajanga agütsüba taochi aser ochi taküm nungi pilaogo," ta ANiE lenirtemisa metetdaksü.

Parnokisa Yeremia 6:16 nung aliba Lai tekong lemsatep.

Iba Lai nung yamai shia lir, "Kibuba yamai ashir: Nenok lenmang nung nokdakang aser ajiang, aser akhi lenmang kong lenmang tajung lir, aji asüngdangang; aser iba nungji jajang, aser nenok tanela asoshi anisüngzükdak angutsü. Ajsüaaka parnoki ashi, "Yangji onok mejajatsü."

Iba sangdong nungji ANiE lenirtem- Andy Lines, Stuart Bell, Tim Davies, Ian Ferguson aser Lee McMunn nungeri sign

Parnokisa, tarutsü atema shisadangba mapang nung parnoki Church of Anglican nung tamangertem atema sarasademtsür, ta metetdaksü.

"General Synod-i shimba lenmang nung mejajaner lenirtem aser tamangertem atema taruba hopta aser ita ishikaji kanga sarasadema Kibuba bushiba mapang ka asütsü. Ajsüaaka onoki nenok den nokdaker aser nenok atema sarasademtsür," ta parnokisa metetdaksü.

Church of England kübok Evangelical Council national director, Rev. Canon John Dunnett-ia iba telemtetba agiba ajanga pa mepelar, ta shiogo.

Rev. Canon-i, "Iba telemtetba agiba ajanga Arogotem nung züngsemtem tsüngda telemsa adoktsü, putirtem aser bishops tsüngda tesendaktep raksatsü aser Arogo aika nung züngsemtemi, sannükertemi parnok sendoker amai bilemstü," ta metetdaksü.

ANOGO ABEN TSÜNGREM DEN

Sempettem Rom 8: 28-39

Kechiyong tesüiba süshia, taküm süshia, kotak tenyartem süshia, yimsüsürtem süshia, tang alibatem süshia, tarutsü alibatem süshia, ain aketbatem süshia, tema nung aliba süshia, telung nung aliba süshia, tangar teyangluba oset süshia, asen Kibuba Khrista Yisu dak aliba Tsüngrem temeim nungi asenok piladaksütsü makoktsü ta ni chichia amanger. Rom 8: 38-39.

Oh! Koda tejangja. Kechaia Tsüngrem temeim asenok nungi bener aotsü makok.

Asenok meketa tashi aikati asenok nungi aji bener aotsü meranger. Kaji asenoki pei sasa meimba. Asenoki Tsüngrem temeim dang nungi asen taküm, temang, asen mapa, asen temeten mesüra asen rongsen taoba züngshir. Asenoki kotak ajangzüktsü merangba dang nungi alima nükjitungang arishir.

Asen meketa Tsüngrem temeim den toktepa tashiji alima lir. Asenoki sen tali penputsü alimai atitanger, tangari tali metetta kümdaktsüner aser konang tali aginüba agi asenok atitanger. Aser Khrista nung Tsüngrem temeim asen meketa aliba den aritepdang tebilemdangba makar.

Satani item Tsüngrem matenba tashiji koda meimer! Pai akoktsüba lemanng ajak aser temeten bushitsü aser temulung süa alitsü shisatsü agütsütsü mapang tajung teti bushir. Alimai inyakba ama inyaktsü teti ajungshir.

Saka aji tokjang. Tsüngremi ne taküm asoshi atsütepba nung dang ne den atener masü saka na asoshi rarar. Tatok agütsüba Pa temeimi ne taküm piyong, teti taküm tashi, na yaritsü. Pa dak aser Pa O nung amangang.

Ne tenüng asanger, Tsüngrem Yisu tenüng nung onok den teti dena liang. Amen.

Franklin Graham-i Israel semdang; Samaritan's Purse-i ambulance 21 agütsü

November 17, 2023: America nung Evangelical lenir, Franklin Graham-i Bodhbarnü Israel Ato kilonser, Benjamin Netanyahu ajurua külemi sarasademogo.

October 7 nü Hamas teloki amakba tesem aika pai semdangba sülen Netanyahu ajuru.

Khristan melungtet telok Samaritan's Purse nung CEO aser Billy Graham Evangelistic Association Tir, Franklin Graham-i sangdong ka ajanga, "Ni Netanyahu ajuruogo aser Ato kilonseri sarasadem nüngdaker. Par linük (Israel) tentetba sülen mapang tamajungtibaji pai ajangshir. Tawa Hamas-i amakba mapang nisung aika tepsetogo aser tetsür-tanurtem densema nisung 240 dak tema puer ogo," ta metetdaksü.

"Pua alirtem aser parnok kibongtem atema sarasademjang, Ato kilonser Netanyahu atema sarasademjang aser Yirusalem nung yimjung atema sarasademjang," ta pai metetdaksü.

Taoba ita Hamas kiralongrartemi Israel amakba

sülen Samaritan's Purse teloki disaster relief team ka Israel-i yok aser tang tashi parnoki Israel aser Gaza naprongla nung Arogo 50 shi den longjemer inyakdar.

Samaritan's Purse telokisa Palestine nungertem nem chiyungtsü aser mozü agütsüba Arogotem den yaritepdar.

Hamas teloki Israel amakba sülen Samaritan's Purse-i Israel nem ambulance 21 tenla agütsü.

"Tanü tashi nung Samaritan's Purse teloki Israel nung jenshia aliba kibongtem nem hygiene kits den chiyungtsü agütsüdar. Iba dak alia onoki medical teyari agütsüogo," ta Samaritan's Purse-i metetdaksü.

Samaritan's Purse-isa Gaza aser Israel naprongla nung emergency field hospitals amenoktsütsü asüngdanga liasü.

Mongobarnü Graham-i X ajanga, "Ni tang Israel nung lir aser tanü onok Gaza arrtsülen tashi oa jila aika semdangogo. October 7 nü Hamas teloki amakdang item jila ka nungbo nisung 130 tepset aser 26 puer ao. Tangbo yangi IDF (Israel Defence Force) sepaitem dang lir," ta metetdaksü.

AO OSHI ANGAZÜKDAK:
TANÜ ANGAZÜKTSÜBA OJANG



Tir Yimyim

Semrung

(n) alu nung süngsang aser jana bendena arungba tesem (burning place of debris in field)

* Semrung nung mersü kanga ajunger.

Semsa

(adv) temerük, tebetet, temeja (clean and not complicated)

* Merenba semsa agi telok nung pa balaka repringteter.

OLONG PAITEP # 6619

1							2		
3		4					5		
						6			7
8									
								9	
			10		11				
			12						
	13					14			
			15						

TIPIEN

- 1. Kelakoktsü - (9)
- 3. Tetsüng-teben agi kongshi - (5)
- 5. Ne sasa - (3)
- 6. T ___ m - (3)
- 8. Kidong ka tenüng - (6)
- 11. Yarisem - (6)
- 12. T ___ pang - (3)
- 13. Tebur oset ka - (3)
- 14. Tamangbaren - (5)
- 20. Takoker nem jong sempet agütsüba - (9)

LANGTSÜNGLEN

- 1. Atsüa talang kümdaktsü - (8)
- 2. Menjendi telok - (5)
- 4. Mejangjai aküm - (4)
- 6. Süngrangtsü agi - (5)
- 7. Tzü atsüngtendak - (8)
- 9. Per tulu ka - (4)
- 10. Aonung chiyimba ozü ka - (5)

OLONG PAITEP # 6618 TELANGZÜBA

TIPIEN:

- 1. Tanga, 6. Wara, 7. Rajang,
- 9. Anük, 10. Jenjang, 11. Alar,
- 14. Ngashi, 15. Nala, 16. Mechi.

LANGTSÜNGLEN:

- 2. Anga, 3. Yabang, 4. Tarok,
- 5. Orak, 8. Ainer, 9. Anema,
- 10. Jabili, 11. Among, 12. Miim,
- 13. Anem.

NAI-A YA METETTER MA



Jakrep chir ana tenüng agi Amy aser Katie na yangi noksa nung angur. Tena yabo jakrep süaka tangar dang nungi khenyongi balaka kechiaser tantsüla Amy sor anogo 87 sülenang tenu Katie aso. Jakrep chirtem rongnung tetsüngda talangtiba lir asobaji tang tashi nungbo tena lir. Iba nungji tenadi Guinness World Record dena ngutetogo. Tetsür chanu ana tetsüji Maria aser tebuji Chris lir.

Meghalaya MLA temi Public Policy Workshops nung aden



Shillong, November 17, 2023 (Agencies): Indian School of Business (ISB)-i Meghalaya sorkar den külemi Members of the Legislative Assembly (MLAs) asoshi residential public policy workshop ka agir.

Iba workshop ya ISB nung Bharti Institute of Public Policy den külemi Meghalaya Institute of Governance ajanga ayongzüker.

November 16-18, 2023 anogotem Meghalaya Legislative Assembly Speaker Thomas A Sangma, Leader of the Opposition Ronnie V Lyngdoh, Government Chief Whip Nujorki Sungoh aser

Opposition Chief Whip Saleng A Sangma nung den MLA 35 iba workshop nung adener.

Iba workshop ajanga Meghalaya nungi MLA temi state nung innovative entrepreneurship aser investment ecosystems renlokdaaktsütsü akok. Iba ajanga Meghalaya nung lanurtemi mapa inyaktüsü maongka tasentem angutsü.

Bharti Institute of Public Policy Director Aarushi Jain-i introductory session ka agia workshop tenzük. Iba sentong nung Meghalaya Legislative Research Fellowship aser constituency development plans nung temulung agütsü.

Workshop nung taoba Advisor to the Prime Minister Amarjeet Sinha, IAS (Retd.), taoba Ambassador of India to the Netherlands Venu Rajamony aser Bharti Institute of Public Policy Executive Director Prof. Ashwini Chhatre nungeri shisalen sayua liasü.

Principal Secretary & Development Commissioner, Government of Meghalaya Sampath Kumar-ia MLA tem asoshi workshop ka agia liasü.

Meghalaya MLA temi Telangana sorkar indang public-private startup ecosystem enabler T-HUB aser Telangana State Integrated Command & Control Centre semdanga liasü.

Assam nung ex-NRC coordinator Prateek Hajela okadaki maru

Guwahati, November 17, 2023 (Agencies): Kamrup (metro) additional district & sessions judge ajanga taoba National Register of Citizens (NRC) Assam coordinator Prateek Hajela okadaki jaok saka pa maru.

Hokolbarnü Hajela okadaki maruba agi pa anema ken o benoker dang newspaper-advertisements ajanga iba sangdong agütsütsü temelaba agütsüogo.

Iba ken o benoker ya Luit Kumar Barman lir aser pa ya entrepreneur nungi film

producer akümbe nisung ka lir.

Pai ashiba agi Madhya Pradesh aser Assam nung osangkaket ana nung English o Hindi ajanga sangdong agütsütsü kechiyong Hajela ya Madhya Pradesh nungi lir.

Comptroller and Auditor General of India (CAG) ajanga Assam nung NRC update maparen nung Rs 260 crore tema tim mesüi amshiba putet aser iba atema Hajela aser system integrator (Wipro limited) anemo ken o benoktsü shidanga liasü.

Wipro danga November 17

nü okadaki arutsü ashi aser parnoki tanü affidavit ka agütsüogo.

Ajisüaka NRC maparen nung shilem agir Integrated System and Services anema ken o mebenok aser iba jagi Kamrup (metro) additional district & sessions judge-i Luit Kumar Barman dang teinyaktsü tim inyaktüsü metetdaktsü.

Okadaki February 6, 2024 nü iba ken o angadangtsü aser ken o benokeri advertisements asüba osangkakettem agütsütsü tetuyuba agütsüogo.

NSCN (K-YA)-i Arunachal nung aayanger 2 pur ao

Guwahati, November 17, 2023 (Agencies): Arunachal Pradesh kübok Longding district nung NSCN (K-YA) telungpur aseme aayanger ana pur ao ta osang angazüker.

Kunsa Pongchau lenmang nung Tisa ayong anasa aayangertem anenzükba tesem ka nungi par asem pur ao.

Brihostibarnep 4:00 ako meta aayanger asem ya Bolero pickup truck ka nung anir Kunno Zero Point-i ao. Iba sülen Kunnu nung gariji toktsür Indo-Myanmar arrtsüleni ao ta osang ajanga ashi.

Telungpurtemi pur aoba nisung ana ya Uttar Pradesh nungi Shashank Yadav aser

Nginu nung Lemgaw Gowam na ta jangjaogo. Tenaprong ya BTRF Project kübok Shatrughan Singh indang mapa inyakerem lir.

Nisung pur aoba maparen ya NSCN K-YA züngsemtem Lt.Col Botai Wangsu aser Lt.Abojak Wangnow nati atonga inyak ta osang ajanga ashi.



ajanga iba sentong athir. Hokolbarnü India Meteorological Department (IMD)-isa Northeast ajungalen tsüngsang majungtsü aser tzünglu kanga arutsü osang metetdaktsüogo. (Shillong, November 17).

Meghalaya nung Cherry Blossom Festival ayongertemi Hokolbar nikongdang Day 1 indang sentong athiba osang metetdaktsü. Tsüngsang kanga majungba ajanga sentong athitsüsa akümer ta benjung ayongertemi ashi. Hokolbar nikongdang 5:00 ako nungi musical extravaganza tulu ka tenzüktsüba liasü saka Brihostibar aonung nungi tzünglu aruba manenba

Gaza civilian asüba ajemdaktsütsü merangba nung takok mangu: Netanyahu

Tel Aviv, Yimpoksuü/Nov. 17 (Agencies): Gaza nung raradak nungi civilian tem anitetsü asoshi Israel mitkari akokba mera ajak agir saka nisung asüba ajemdaktsütsü merangba nung takok mangu, ta Israel Ato Kilonser Benjamin Netanyahu-i ashi.

US television channel CBS News ajanga Brehostibarnü Israel lenir dang, Hamas-i October 7 nü amakba tayang kepzükdang Palestine nung nisung meyerijang aika tepsetba ajanga putu tasen nung tesempatet adoktsü asü ta asükdang dang pai iba o ya langzua liasü.

"Civilian asüba ya takoksa tulu lir. Aser yamaji masütsüka, kechiaser lendong nungi civilian tem anitetsü asoshi onoki mera ajak agir aser Hamas-ia parnok lendong nung yutsütsü asoshi akokba mapa inyaker," ta Netanyahu-i ashi.

"Anungji onoki leaflets yok, parnok indang cell phone tem nungi jembia aser ainshiang ta ashi. Aser aikati yutsü," ta Netanyahu-i ashi.

Kasa anogo Israel indang air force ajanga south Gaza nung leaflets yoka nüburtet dang pei kumzüksü asoshi ainshitsü shia liasü.

Ajisüaka parnok koloni jena aotsüar memetet liasü, kechiaser Israel-i maneni iba tesem ajungalen rarar.

Hopta ishika sülena Israel-i northern Gaza nung leaflets yuka civilian tem dang south leni aotsü ashi.

Nisung meyerijang aikati yamaji inyaker, aser Palestine nung aikati ibai teti atema

alitsü südi ta tsübor.

Mitkar temi tang mera agiba ya Hamas samatsütsü nukjidong nung lir, ta Israel-i ashir.

"Ni ashitsü agi, onoki civilian asü-amaba tajemba nung mapa tembangtsü merangtsü. Aser yamaji onoki inyaksü meranger, civilian asü-amaba ajemtsü. Saka tia maka, onoki yamaji meinyakteter," ta Israel ato kilonseri ashi.

Hamas-i civilian tem timba sür Israel nung nisung 1,200 tepsetba langzua Israel-i hopta aika military campaign agiba nung Palestine nung civilian tem ang timtem ajurur.

Hamas-i linük balala nungi nisung 240 shi pua ayu ta Israel-i ashir.

Gaza nung aliba al-Shifa Hospital anasa ki ka nung pua bener aoba nisung tasümgang, sepai tetsür, ka ngutet ta Israel mitkar temi Hokulbarnü ashi. Tan hopta Israel-i iba mozüki nung tenük yoker amaker.

Hamas-i video ka lemsatepba nung la takum liasü saka la asüba ya Mongulbarnü jangja aser Israel-i tayimtsü amshia amakdang la asü ta Hamas-i ashi.

Al-Shifa Hospital nung Hamas-i amshiba longpok ka ngutet ta Israel mitkar temi ashir. Mejangjaba video ka nung ali nung longpok ka sayu aser aji müketa longsang, süng aser litem liasü.

Iba tesem ya tutoker amai liasü, kong tesülen bulldozer ka liasü.

Army temisa ashiba agi hadir aika bena aliba gari ka mozüki nung parnok ngutet.

Onoki al-Shifa mozüki

amshir ta Pentagon aser US State Department-i jembiba ya tiazü aser temenünüsü osang lir, ta Hamas-i Brehostibar nikongdang sangdong ka nung ashi.

Al-Shifa Hospital nung Hamas inyaksangshi indang onok itdangiter temi asadanga nung United States temoung ajema mali aser iba dak tali rasaa mashitsü mesüra melemsateptsü, ta White House odongtar John Kirby-i Brehostibarnü ashi.

Human Rights Watch ajanga mozüki ya international humanitarian law kübok alakteta wazüka lir ta ashir.

"Mozüki nungi mapa tamajung inyaker ta sayura item wazüka ayubaji samar alitsü," ta HRW indang UN Director Louis Charbonneau-i ashi.

October 7 nü Hamas-i amakba sülen EU foreign policy chief Josep Borrell-i Israel mezümgang semdangba mapang Israel nungerdang Gaza nung civilian kumzüka ayutsü asoshi tali inyaksü ayongzük.

"Nenok jashiba ni angateter saka iba tejashi nem nenok tekokdaksü ta ni ayongzük," ta Borrell-i ashi.

Israel-i tayimtsü amshia bomb pokoktsüba aser alilen nungi amakba nung nisung 11,500 shi süngo aser yangji tilatanur 4,700 dak tema lir ta Gaza health authorities ajanga ashiba ya shidak alitsü ta United Nations-ia ashir.

Gaza Strip nung nütsümgang yongsük million 2.3 aliba nungi asemsü kumer anasü rara ajanga talidak ki maka kumtsüngo.

Cholera mechi Zimbabwe yimtiba nung state of emergency sangdong

Harare, Yimpoksuü/Nov. 17 (Agencies): Saksü-pokshi wara (cholera) poktetba mechi Zimbabwe-i linük yimtiba Harare nung state of emergency sangdonga lir.

Iba tashidak yagi nisung aika takum samaogo aser temolung meleme cases 7,000 dak tema lir.

Yimti ajungalen iba tashidak poktetba ajanga 2008 kum iba tashidak poktetba bilemteter, kong nisung meyerijang aika asü, ta yimti ketdangtsür temi ashir.

"Cholera mechi onoki state of emergency sangdonger," ta Mayor Ian Makone-i sangdong ka nung ashi.

Iba tashidak tali prokshia aoba azüoktsü aser tajemtsü tzi tajung agütsütsü atema ketdangtsür temi teyari meshir aser teyari anguba agi meperir ta ashir.

Iba tashidak poktetba sülen shiranger aika anepalutsü tim atemer ta International Federation of the Red Cross (IFRC) ajanga ashir.

Shiranger tem anepalutsü

health workers peria mali aser tashidak menatepa aoba anendaktsütsü supplies peria mali ta ashir.

Tajemtsü tzi temürek maliba mapang Zimbabwe nung ita ishika iba cholera tashidak den rara arur.

Tang tesüsa poktetba tashidak ya Harare nung nütsümgang yongsük onsara aliba Kuwadzana jila tiyong sür lir, aser tashidak putetba tesadang jungnua yangji lir ta ketdangtsür temi ashir.

Cholera ya saksü-pokshiba tashidak ka lir, koba bacterium Vibrio cholera aliba chiyongtsü mesüra tzi achi-ajemba nungi adoker.

Tepok aoba aser saksüba mapang indokba tzi aser metsü melentsü asoshi iba tashidak agi shiranger nem oral rehydration solution agütsür.

Tang pokteta liba cholera ya 2008 kum poktetba den mesüktepa lir, ta Harare mayor-i Brehostibarnü ashi.

Iba kum cholera tashidak agi nisung 4,000 dak tema asü aser

nisung 100,000 shi menepa liasü.

Iba yongji Tir Robert Mugabe-i mapang talangka nungi pa den tokteper Morgan Tsvangirai den tashi lemsar yimsü asütsü molung.

2018 kuma typhoid aser cholera dak sendakba nung nisung 20 asüba aser nisung 2,000 dak tema shirangba sülen state of emergency sangdonga liasü.

Linük nung cholera tashidak alitsü südi ta temolung melemtetba cases 7,398 lir, nisung 50 asüba jangjaogo aser nisung 109 mozü kidang lir ta ministry of health ajanga Mongulbarnü sangdonga liasü.

Iba tashidak ya kanga kera prokshia aor aser district 62 aliba nungi 45 nung aser linük indang province 10 prong nung kongshia lir, ta IFRC ajanga ashir.

Iba tashidak ya arütsü alemtsü imlar ta ashi.

Malawi, South Africa aser Mozambique densema kidanger linüktem nunga taoba mapang cholera tashidak pokteta liasü.

SÜR KÜM KA AJUNGER



Onoki teti meima aliba Lowaba Pongen
18.11.2022 - 18.11.2023

Nai onok yutsür kum ka jungaka anogo kata na onok mulungjang nungi metokor. Nü temeim aser aria bilem onok mulungjang nung teti alitsü. Asenok tanaben majurutep tashi na kotak nung jangratema alitsü sarasademtsür. Onoki na kanga menungrar. Kotak nung tesunep nung anisungzükang!

Temeim Oja, Oya & Kinungertem

Myanmar: Chin State nung mitkari school amakdang tanur ti asü

Naypyidaw, Yimpoksuü/Nov. 17 (Agencies): Myanmar

mitkar temi jet amshia Chin State kübok school ka nung bomb poklokttsüdang tanur ti densema nisung 11 asü, ta yimdaklir temi ashir.

Tenem agi sünga aliba region kübok tesem tezülen Vuilu yimtsümgang nung iba lendong ya Bodhbarnü atalok ta ashir.

Tang Myanmar nung civil war adoktsü anameta nung lir, kechiaser 2021 kum election ajanga shimba sorkar atsügdokba sepaitem den telungpur telok aikati raratar.

Mitkar anemer tashi ita aliba tesemji Chin State ya lir.

Tan hopta ethnic Chin fighter temi India den arütsü anasa Rikhwadar jila tanaben agia liasü.

Ajisüaka Vuilu nung telungpur mali ta yangji alirtemi ashir, kong kilen 80 majung aser state south tsütsü lir.

Yangji alirtemi social media nung ashiba agi, Bodhbar nikongdang mitkar indang tayimtsü nungi bomb ana iba yimtsümgang nung poklokttsü.

Bomb kati ki ka poksatsü, koba school ama amshia liasü aser iba mapang yangji lesson zünga aliba tanur ti aser tain asem tepset. Asürtem rongnung arishi kum 34 tain tesayur Ha Luang aser pa tetsü aser par tanur ana densema lir.

Iba lendong asüba tanurtem ya arishi kum tenet nungi 11 tsümgang liasü. Kasa mapang bomb yagi ki kar aser yimtsümgang indang tekülem ki ana raksatsü.

Southern Chin State nungya armed forces aser telungpur telok balala tsümgang mapang shia rarar, saka yangji alirtemi Vuilu nung raraba meliasü aser iba yimtsümgang ya kechiba

amakar mangateter ta ashir.

Testüba hopta asem tsümgang linük tesem balala nung opposition forces temi amakdang mitkari tentetba sorkar tamakok aisü nung ajuru aser parnok meyiper amaktsü asoshi anünglen tashi dak metaloka lir.

2021 kum tashiyim amshia sorkar atsügdokba sülen mitkar lenirtem anema nokdaker tem rongnung Chin State nung alirtem ya mezümgang liasü, shirnoki pei kidang yangluba tumiorhunting rifles amshia military convoys amaker.

Tekong-tenem agi sünga aliba state nung parnok sasa tentetba militias tem Chin Defence Force küboki aita arütsü alema oa India nungi hadir tajung bener aru tenzük.

Chin State south tsütsü Paletwa jila temeket nung mitkartem aser Arakan Army telungpur tsümgang kanga sashia raratagi, shirnoki tangbo anasa aliba Rakhine State tuluba amokbanga lir.

Ethnic Chin telungpuri military bases aika takok ngua agiogo aser jila tulutem nunga parnok sorkar meyong sepaitem sapanga yur rarar.

Chin nungya Khristanpur timba lir aser parnok central sorkari senzüka yutsü aser mejungi amshia arur ta mapang talangka nungi jembia arur. Taoba mapanga iba state nung telungpur telok yakyaka liasü.

Ano China den arütsü lena Shan State nungi ethnic minority armed groups asem lungjemer aser allied pro-democracy fighter temi mitkar anema kanga sashia rarar.

Shan State nung raraba sorkari mazüoktetra linük paksatsü ta mitkari shimba Myanmar tiri shia lir.

DYRS ajanga Youth Adventure & Rural Sports sentong ayongzük



Dimapur, Yimpoksüi/Nov. 17 (TYO): Department of Youth Resources & Sports, Government of Nagaland ajanga November 13-16, 2023 anogotem GHS Mangmetong aser Doyang Hydro Electric Project nung phase tanabuba Rural Sports in Basketball Tournament aser Youth Adventure Programme ayongzükua liasü.

Rural Sports tenzükba sentong ya District Sports Officer, Mokochung, Anguvito Sema-i moatsü aser shibangba aser sempet agütsüba sentong Kethosituo Sekhose, NCS, Director, Youth Resources & Sports ajanga moaja liasü.

Tanurtem aser lanurtem saisapong ya pei jangraba ka dang masü saka profession ka ama kumdaktsütsü ajungmesoa sorkari Innovative Programmes kübok Rural Sports ya ayongzük, aser item sentong ya ajanga departmental coaches tem nem State Sports Academies asoshi sempet alirtem jangjatetdaktsür, ta Anguvito Sema-i ashi.

Iba sentong shibangba mapang Kethosituo Sekhose, NCS, Director, YRS ajanga takoker nem sempet agütsü aser asayamung nung shilem agiba kaketshirtem dang Department-i agütsüba facilities tajungtiba nung amshitsü ayongzük.

Paisa kaketshirtem dang saisapong ajanga temang aser tekolok shidak ayutsü ajungshia liasü.

Yimtsung nung Rural Sports ayongzükba atema Mangmetong village council chairman-i sorkar dang pelaba lemsatepa liasü.

Final nung GHS Longkhumi 2nd NAP Hr. Sec. School, Alichen madak takok angu. Tetsürtem asoshia exhibition match ka GHS Longkhumi aser GHS Mangmetong tsungta asaya liasü.

Doyang Hydro Electric Project nung akaba Youth Adventure Programme nungya Zip Line, River crossing, Rappelling, Eco Tourism, Tent-Pitching, Survival & Rescue Operation workshop, cultural

programme aser hiking liasü. Iba Adventure Programme nung district tenet nungi higher secondary nung azungba kaketshirtem shilem agia liasü.

Alakteta jaoker ama jembidang Directorate ketdangsur temi iba ama sentong tajung ayongzükba asoshi Anthony Nuggie, NCS, Secretary, Youth Resources & Sports ajanga tenüngsang agütsü.

State nung aliba lanurtem kati ka indang tali angazüktsü, tembar ayimtsü aser kasa mapang asen state tebour ajungba angatetsü asoshi sorkari iba amala sentong ya ayongzük, ta pai ashi.

NAAME team ajanga eco-tourism dak sendakba nung maparen balala inyakba den workshops ayongzükba asoshia pelaba ashi.

Iba sentong nung menden Jakedovo Chase, Dy. Director ajanga DHEP indang Land Owners Union tir aser NEEPCO (DHEP) dang parnok indang facilities amshidaktsüba asoshia pelaba shisema liasü.

Arsene Wenger-i Bhubaneswar nung AIFF-FIFA Academy lapoktsütsü

Yimpoksüi/November 17, 2023 (Agencies): Nungtugu football coach Arsene Wenger-i UEFA talent development scheme kübok Bhubaneswar nung November 21 nü AIFF-FIFA academy lapoktsütsü.

Wenger shiba FIFA indang global football development programme tekolakba lir pai November 18 nungi 23 tashi India semdangts aser ISL, I-League club tem den ajurutepeba den Indian football nung youth development nung sendaka alirtem den ajuruteptsü.

Wenger ya 1996 nungi 2018 tashi Arsenal indang manager liasü aser pa lenisüba nung club-i Premier League titles asem, FA Cups tenet aser pa lenisüba nungsa club asaya 49 tashi khen danga tamakok mongui asaya liasü.

Iba dak sendakba nung Odisha CM Naveen Patnaik-i, "linük nung lanur asayartem anitetsü atema India nung mezüngbuba #AIFF-FIFA Talent Academy amenoktsü

asoshi FIFA-i #Bhubaneswar shimba pelashishia sangdonger. Iba asaya terenlok asoshi takokba tashi teyari agütsütsü #Odisha Govt bendanga agütsür lir aser linük nung football asayartem atema facilities tajungtibatem yanglutsütsü asoshi @IndianFootball den kanga junga sendaktepa inyaksangshidar," ta ashi.

FIFA indang talent development scheme nukjidongji alima ajunga nung member associations den longjemer inyaka item linüktem national team jenjang tajungba kumdaktsütsü asoshi lir.

"Arsene Wenger-i November 19 nungi 23 tashi India semdangtsü. India semdangba mapang pa aser par team-i ISL, I-League club tem aser Indian football nung lanurtem terenlok asoshi inyaktertem den ajuruteptsü," ta AIFF tir Kalyan Chaubey-i Bodhbarnü sangdong ka ajanga metetdaktsü.

"Onok nukjidongji iba academy ya kanga junga yangertsü asoshi lir. Wenger tajangshibatem aser tangatetba ajanga iba academy ya world-class facility ka kumdaktsütsü asoshi teyari agütsütsü ta onoki tamang akar," ta paisa ashi.

AIFF acting secretary general M. Satyanarayan-i ashiba agi, iba ya All India Football Federation's (AIFF)-i küm aika nung ajangteta aotsü asoshi nukjidong ayuba aser arishi küm 14 tekübok alir tanur asayartem dak rangloker inyaktsü asoshi sentong yanglur aliba nung shilem ka lir.

FIFA-i, FIFA-trained coach asütsü Sergi Amezcua Fontrodona recommend süogo, shiba iba project benoka inyaktsü atema India-i arutsü aser FIFA-AIFF academy head coach ama inyaksangshitsü.

Amezcua ya taoba mapang China nung football terenlok asoshi inyaksangshiba nung Barca Academy Pro Haikou nung project director liasü.

World Cup Qualifier nung India-i Kuwait akok

Kuwait City, Yimpoksüi/Nov. 17 (Agencies): Brehostibarnü FIFA World Cup 2026 aser AFC Asian Cup Saudi Arabia 2027 Preliminary Joint Qualification Round 2 match asayadang Manvir Singh-i goal ka agüja Kuwait madak India-i 1-0 agi akok.

Jaber Al-Ahmad International Stadium nung asayaba mapang Lallianzuala Chhangte-i minute 75 buba nung cross yokba Manvir-i tetsung abelen agi goal nung metsüokja liasü.

Asaya tenzük dang telok anaprongi kanga junga saya katia ka tema goal agütsütsü maongka magütsü. India asoshi minute 19 buba nung goal yoktsü mezüngbuba maongka angu, saka Nikhil Poojary-i yokba ball Sunil Chhetri-i box telung nungi metsüba tezülani ao.

Minute 42 buba nung Kuwait goalkeeper Kameel Marzouk-i pass agütsüba ball Manvir Singh-i rakzük saka alanga liasü.

Second half nung telok anaprongi kanga meranga asaya. India nung Naorem Mahesh, Sahal Abdul Samad aser Manvir Singh nungeri Kuwait defence

rakpoka alutsü merang saka goal magütsütsü.

Iba sülen India nung coach Igor Stimac-i Mahesh melen Lallianzuala Chhangte aiddaktsü aser pai Manvir Singh dangi low cross yokba nung Singh-i aibelen mesüi goal yoktet.

Minute asem dang asayatsü lia Kuwait nungi Faisal Al Harbi-i yellow card tanabuba ngua asaya nungi tokodaktsü.

November 21 nü India ya Asian champions Qatar den Bhubaneswar nung asayatsü.

Group A nung India ya Qatar, Kuwait aser Afghanistan den lir aser iba telok nungi temaba team ana FIFA World Cup qualifiers round tasembubai aitsü.

Group shia nungi temaba team ana-na 2027 AFC Asian Cup asoshi qualification angutsü.

India nung ya kodanga AFC indang FIFA World Cup qualifiers round tasembubai metudang.

Alima nung India ya rank 106 nung lir aser July ita SAFF Championship final nung paroki rakn 149 nung aliba Kuwait madak penalty metsütepba nung takok ngua liasü.

Bulgaria-Hungary Euro 2024 qualifier asayadang raratep, aika yiru

Sofia, Yimpoksüi/Nov. 17 (Agencies): Bulgaria-i Hungary den Euro 2024 qualifier asayadang football sapurtem aser police tsungta raratepa police 33 aser football sapur 24 yiru, ta ketdangsurtemi Hokulbarnü ashi.

"Yirur aliba nisung 24 temang repringo aser parnok rongnung nisung tenet tekolak, tetsung aser teka yirur mozü kidangi ao aser aika dak pepper spray khaloktsü," ta emergency centre indang odongtar Katya Sungarska-i Hokulbarnü osangbener dang ashi.

"Police 33 yiru aser kar kanga sashia yirur mozü kidangi ao," ta Sofia police directorate nung deputy chief, Stefan Ivanov-i ashi.

Yasung football fans 33 puogo aser maneni apur aser ibai public order anema inyakba lir aser lendong tulu liasü, ta pai ashi.

Football fans temi Bulgarian Football Union (BFU) ajanga longkak aittsü ayongzükba sülen timtem ajurutsü tetsübo nung national federation ajanga mepishiba ama iba asaya ya kishi shibanger asayatsü UEFA-i totuyuba agüja liasü.

Police temi ashiba agi, Hokulbarnep Sofia nung national stadium temalen nisung 4,000 dak tema adenshia longkak ait.

Parnoki "Anenang!" ta ayimten aser "Küm 18 ji teperi" ta banner nung zülua bener BFU tir Borislav Mihaylov menden nungi alutsü takhangba agüja liasü.

Fans temi police dak smoke bombs, pavement blocks, long aser beer bottle tem mereploksüba sülen raratep ya tenzükua liasü.

Security asoshi iba tesem nung police 1,500 dak tema anti-riot gear nung liasü.

Nüburtem senshidaktsütsü mechi water cannon ana yok, koba Balkan linük nung kangabo mamshir.

Longkak aiter temi police minivan ka aser jana bendenba pongdang nung mi senloktsüba police temi meindokba sülen nisung tenet tekolak nung yirua aliba osangbener kati angu.

National team-i junga mesayatetba aser asayamung tulu kata nunga shilem magitetba aser federation tekolakba ama Mihaylov mapang coach aika melentepba ajanga football sapurtem tali jashia akum.

Mangatetep alisang BFU tir ya 2019 nung anen saka pai mapa yutsüba agiena 2021 küm tanaben shimtet. Pai match-fixing mapa inyak ta temolung malemer aser 2019 küm England den sayadang kin aser sentsü dak ajemdaker o tamajung jemi ta tai tonglojka lir.

Brehostibarnü asaya ya telok katia mokoki 2-2 nung tembangaka Euro 2024 qualifying group nung Bulgaria ya ajak dang tsunglangba nung asaya tenet nungi points asem bener lir.

Iba asaya mechi Hungary yabo finals asoshi qualify süogo.

BILEM DANGANG

"Pela linüra meranga inyakang aser dangar meimang."